

## Babūnelē

Bova mona babūnelē  
Tropne, vīkos motriškelē.  
Kvietkeles laba mylieje,  
Nieka anoms negailieje.

O pilipuonu daugībē  
Api kryžio teik klestieje.  
Ka susiediems baise maišē  
Gegožines maldas melstē.

I susiedes poušteis stēngēs  
Tom kvietkeliem anuos mainies.  
Babūnelē sieje, deigē,  
O papūnis vēn bombieje.

– Rek čia tau tu kvietku teik,  
Geriau braškes tu padeik,  
Bus bent šiuoki tuoki nauda  
Laba skane ir so peino.

Susitarkem veina kārta:  
– Aš kvietkeliū nebedeigsio,  
To arielkos nebeplėmpsi,  
Būsem abo veins ont vēina.

– No, su buobom prasidiesē  
Nieka gera netoriesi –  
Velne – pīpkē prisigrūdēs  
Sumormieje tep papūnis.

– Vīrams gerklē, kad pradēlst,  
Rek arielkas pēlt i pēlt...  
Babūnelē tep atkērta  
Ēr nueje kvietkas deigte.